



UPA 2014/138.1
1. april 2014
Aqqaluaq B. Egede

Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuinermi iliuusissat pillugit Inatsisartut inatsisaata allanngortinneqarnissaa pillugu Inatsisartut inatsisaat nr. xx, xx. xxxx 2014-imeersumut siunnersuut.

(Avatangiisinut Pinngortitamullu Naalakkersuisoq)

Nunatsinni inoqarfiit amerlaqaat. Inoqarfimmiit inoqarfimmut assigiinngissuseq nikingasinnaalluarpoq, atugassarititaasutigut, aningaasarsiornikkut aammalu atortulersuutitigut. Annaassiniarnermut upalungaarsimanissaq pillugu inatsisartut inatsisaata allannguuteqartinnissaa siunertaralugu Naalakkersuisut saqqummiussaannut Inuit Ataqatigiit-nnit arlalinnik apeqqutissaqarpugut.

Naalakkersuisut saqqummiussaa aallaavigalugu annaassiniarnissamut upalungaarsimanissamullu akisussaaffik naalakkersuisuniit kommuninut nuunniarneqarpoq. Imaappoq, kommunit sumiiffimmini angallannikkut kiffartuussinikkullu ulorianartorsiorfusinnaasut tunngavigalugit annaassiniarnissamut upalungaarsimasussaataaneq pissusiviusut aallaavigalugit, aamma kiffartuussinerup qaffasissusia tunngavigalugit upalungaarsimanissamut akisussaaffeqarnissamik pisussaaffeqalissapput.

Ullumikkulli naalakkersuinikkut suliaqartugut tamatta ilisimalluarparput annaasiniarnermut upalungaarsimanissamut atortulersuutit piareersimasussaataanerlu sumiiffipassuarni akissaqarfigineqarnatik kinguaattooqaffiummata. Sumiiffipassuarni sillimaniarnikkut atortulersuutit amigaataanerat piuvoq. Annaassiniarnissamut upalungaarsimanissamullu atortulersuutit akimikkut qaffaseqaat, tamannaavorlu kinguaattooqanermut tunngavilersuutaasartoq.

Annaasiniarnissamut assigisaanullu atortulersuutit Namminersorlutik Oqartussaniit aningaasalersorneqarsinnaasimangippata, kommuninut nuunnerinnaatigut ajornartorsiutip qaangerneqarsinnaanera uppernarsaatissaqartinngilarput. Inuit Ataqatigiit isumaqarpugut suleriaaseq killormut ingerlanniarneqartoq. Tassami inatsisissamik atuuttussanngortitseqqaarluni aatsaat aningaasartaanut tunngasut misissorniarneqartut paasinarmat.

Aningaasaqarnermut Nunanullu allanut Naalakkersuisoqarfik Inuit Ataqatigiinnit isumaqatigaarput, piumasarimmassuk naalakkersuisut siunnersuutaat aningaasaqarnikkut suniuteqaqqittussaanginnera erseqqissarneqassasoq. Tassami aningaasaqarnikkut siunniutissaat qulaajarsimatinnagit aalajangersaanerit kukkuluttornissap tungaanut alloriarnerit siullersaattut isigineqarsinnaapput.

Inuit Ataqatigiit isumaqarpugut kommunit aningaasaqarnermikkut oqittuinnarmik inissimangereersut akisussaaffimmik nutaamik misissorluagaanngitsumillu tunineqarnissaat piviusorsiunngitsoq. Kommunimmi pisussaaffilerneqassapput akisussaaffimmik tigusigunik ulorianartorsiorfiusinnaasut suussusersinerisigut ulorianartorsiorfiusinnaasut annertussusaat malillugit annertussusiliinissamik pisussaaffeqalissasut. Tamanna soorunami aningaasartuutissanik nutaanik malitseqartartussaavoq. Tassami annaasiniartarnermut upalungaarsimanissamullu akisussaasoq pisussaaffeqarpoq sumiiffimmi sapinngisamik sillimaniarneq pitsaanerpaaq atuutsissallugu.

Kommunit pisussaaffigilissavaat inatsimmi immikkoortut pingasut, tassaasullu:

- 1.** kommunimi ulorianartorsiorfiusinnaasut, aamma ulorianartorsiorfiusinnaasut suussusersinissaat, kiisalu ulorianartorsiorfiusinnaasut annertussusaannik aalajangersaaffiusumik misissueqqissaarfiusumik nalunaarsorneqarsinnaasut.
- 2.** Kommunimi annaassiniarnissamut upalungaarsimasut, ulorianartorsiorfiusinnaasuni pinaveersaartitsinnaasut ikiuussinnaasullu.
- 3.** Kommunimi annaasiniarnissamut upalungaarsimasut kiffartuussinerisa qaffasissusissaa, tassalu annaasiniarnissamut upalungaarsimasut innuttaasunut, suliffeqarfinnut il.il. pinaveersaartitsinikkut ikiuinikkullu suliniutaasa annertussusissaat.

Ulorianartorsiorfiusinnaasut tunngavilernissaannut kommunit pisussaaffigisassai annertoqaat, ineriartorerullu malitsigisaanik annikinnerulernaviaratik. Taamaattorli annaasiniartarneq upalungaarsimanerlu qulakkeerumallugit aningaasaliissutaasut sumiiffinni pitsaasumik matussusiinngippata akisussaasoq ataasiuvoq, tassalu kommuni.

Inuit Ataqatigiit isumaqarpugut siunnersuutip qiterpiaa assortuussutaanngitsoq. Tassalu sumiiffinni tamani annaasiniartarneq upalungaarsimanerlu pitsaanerpaamik nakkutilliinermik malutseqarsinnaasoq. Taamaakkaluartoq Inuit Ataqatigiit aamma naqissuserumavarput, naalakkersuisut inatsisissatut siunnersuut saqqummiussaata qaappiaannartumik tunngavilersugaasoq. Aamma aningaasatigut kingunissaannik itisiliisoqarsimanngitsoq. Inuit Ataqatigiit taamatut tunngavilersuuteqarluta siunnersuut massakkutut iluseqartillugu akuerisinnaannginnatsigu erseqqissassavara. Taamaattorli Inatsisartut aningaasaqar-

nermut ataatsimiititaliaanni kommuninut sunniutissat misissorneqarnissaat periarfissikkumallugu siunnersuutip siullermeerneqarnerani ataatsimiititaliamut suliassanngorlugu ingerlatinneqarnissaa inassutigissavarput. Aappassaaneerneqartinnagu qulaajagassat misissorneqarnissaat periarfissikkumallugu.